

諱而無一言及芑之罪惡泛常應對而退噫芑之無狀雖愚夫愚婦莫不知之曾謂大臣有所不知而不言哉積威之所劫有自来矣非徒不能建白於平昔雖公論顯發之後亦且難疑畏縮不肯為殿下言之於此亦可見芑之威勢之重而人人因舌公論杜絕馴致於危亡而不可救也豈不尤可痛哉伏願

殿下亟從公論以快神人之憤答曰不見○舍人以三公意啓曰抄啓清簡之人但正二品以上自上當知之故不抄啓矣所抄之人趙士秀周世鵬李浚慶金秀文李世璋洪曇成世章李榮金珣尹春年尹釜尹玪金鎧李滉宋益璟卞勳男答曰知道

史臣曰是時抄啓清簡廉謹之人多不厭衆心如金鎧飾詐釣名之輩亦在選中多有不稱之譏

○夜哭方艮方乾方如火氣

已丑兩司三啓李芑事不久○傳曰清簡之人正二品以上則雖不抄而自上當知之云自上何以盡知乎并為抄啓且守令